

Odluka o imenovanju sudija i osnivanju Suda Bosne i Hercegovine

Koristeći se ovlaštenjima koja su mi data u članu V. Aneksa 10. (Sporazum o sprovođenju civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja navedenog Sporazuma o sprovođenju civilnog dijela Mirovnog ugovora; i posebno uzimajući u obzir član II.1. (d) prethodno spomenutog Sporazuma prema kojem Visoki predstavnik “pruža pomoć kada to ocijeni neophodnim, u iznalaženju rješenja za sve probleme koji se jave u vezi sa civilnim sprovođenjem”;

Pozivajući se na stav XI.2 Zaključaka sa Konferencije o sprovođenju mira održane u Bonu 9. i 10. decembra 1997. godine, a na kojoj je Vijeće za sprovođenje mira pozdravilo namjeru Visokog predstavnika da upotrijebi svoj konačni autoritet u zemlji u pogledu tumačenja Sporazuma o sprovođenju civilnog dijela mirovnog ugovora kako bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada procijeni da je to neophodno” u vezi s određenim pitanjima uključujući (u skladu sa tačkom (c) ovog stava) “mjere u svrhu osiguranja sprovođenja Mirovnog sporazuma na cijeloj teritoriji Bosne i Hercegovine i njenih Entiteta”;

Pozivajući se nadalje na stav 3. aneksa II (Vladavina zakona i ljudska prava) Deklaracije Vijeća za implementaciju mira koje je održalo sastanak u Madridu 15. i 16. decembra 1998. godine, prema kojem je preduslov za uspostavu vladavine zakona u Bosni i Hercegovini uspostavljanje pravosudnih organa na državnom nivou, s kojim se ispunjava određeni ustavni zahtjev da se

odlučuje o krivičnim djelima koja su počinili javni zvaničnici Bosne i Hercegovine u toku obavljanja svojih dužnosti, kao i o administrativnim i izbornim pitanjima;

Imajući u vidu Odluku Visokog predstavnika od 12. novembra 2000. godine (Odluka br. 50/00 Službeni glasnik br. 29/00 od 30. novembra 2000. godine) kojom se donosi Zakon o Sudu Bosne i Hercegovine kako bi se osiguralo efikasno ostvarivanje nadležnosti države Bosne i Hercegovine i poštivanje ljudskih prava i vladavine zakona na teritoriji Bosne i Hercegovine;

Imajući dalje u vidu član 65. navedenog Zakona koji određuje da "ako nakon šest mjeseci od stupanja na snagu ovog zakona sudije ne budu izabrane u skladu sa članom 4, Visoki predstavnik ih može imenovati na period od najviše pet godina;"

Uzimajući u obzir da je Apelacioni odjel Suda Bosne i Hercegovine u skladu sa odredbama poglavlja 6 Izbornog zakona Bosne i Hercegovine (Službeni glasnik br. 30/01 od 19. septembra 2001. godine), jedan od organa čiji je zadatak da obezbijedi zaštitu izbornih prava građana Bosne i Hercegovine i da je nadležan da razmatra žalbe na odluke Izborne komisije Bosne i Hercegovine i Izbornog vijeća za prigovore i žalbe;

Uzimajući dalje u obzir da je 19. aprila, 2002. godine navedena Izborna komisija odredila 5. oktobar 2002. godine kao datum održavanja izbora u Bosni i Hercegovini (Odluka o objavljivanju izbora br. 03-207/02), određujući početak perioda procesa ovjere političkih stranaka, kandidata, koalicija, i listi nezavisnih kandidata skupa sa drugim neophodnim postupcima pred Izbornom komisijom, a što može zahtijevati zaštitu izbornih prava pred Apelacionim odjelom Suda Bosne i Hercegovine ;

Uvažavajući postupak odabira i imenovanja kojeg je sprovela Komisija za imenovanje sudija za Sud Bosne i Hercegovine koja je rezultirala listom od 19 kandidata;

Uzimajući u obzir sve gore navedeno donosim slijedeću:

ODLUKU

o imenovanju sudija i osnivanju Suda Bosne i Hercegovine

1. Na osnovu člana 65. Zakona o Sudu Bosne i Hercegovine, ovom odlukom imenujem slijedeće osobe za sudije Suda Bosne i Hercegovine (po abecednom redu):

- Babić, Miloš
- Halilagić, Suada
- Ilić, Venceslav
- Morait, Branko
- Nikšić, Muhidin
- Popovac, Nedžad
- Raguz, Martin

2. Ova imenovanja u trajanju od tri godine će stupiti na snagu danom donošenja ove Odluke. Prvoimenovani sudije mogu biti ponovo imenovani.

3. Sud Bosne i Hercegovine se osniva danom donošenja ove Odluke.

4. Sudije imenovani ovom Odlukom čine Opću sjednicu i Apelacioni odjel, te će birati predsjednika suda i predsjednika Apelacionog odjela. Oni će izraditi i usvojiti Poslovnik o radu Suda i Poslovnik o radu Apelacionog odjela. Predsjednik Suda i sudije na Općoj sjednici će utvrditi organizaciju Suda kao i uslove za zapošljavanje i opis poslova za zaposlene. Oni će također izraditi i izvršiti budžet Suda.

5. Najvažniji zadatak Apelacionog odjela će biti

odlučivanje o izbornim žalbama u skladu sa svojim nadležnostima. U tu svrhu, nevedeni sudije će obavljati sve potrebne, zakonom određene dužnosti.

6. Svi nivoi vlasti u Bosni i Hercegovini će obezbijediti potrebne tehničke i materijalne uslove kako bi Sud odmah započeo sa svojim radom. Posebno, Ministarstvo civilnih poslova i komunikacija Bosne i Hercegovine zajedno sa Ministarstvom finansija Bosne i Hercegovine, će izraditi i usvojiti sve potrebne propise koji se odnose na utvrđivanje visine plata, kadrovske strukture i uslova rada zaposlenih, kao i obezbijediti neophodna sredstva za početno funkcioniranje Suda. Pored toga, navedeno Ministarstvo civilnih poslova i komunikacija će obezbijediti početni kadar za učinkovit rad Suda.

Ova Odluka odmah stupa na snagu i bit će bez odlaganja objavljena u Službenim novinama/glasnicima Bosne i Hercegovine, Federacije Bosne i Hercegovine, Republike Srpske i Distrikta Brčko.

Sarajevo, 8.05.2002. godine

Wolfgang Petritsch

Visoki predstavnik